



ԽԱՉԱՏՈՒՐ ԱՐՈՎՅԱՆԻ ԱՆՎԱՆ ՀԱՅԿԱԿԱՆ ՊԵՏԱԿԱՆ
ՄԱՆԿԱՎԱՐԺԱԿԱՆ ՀԱՄԱԼՍԱՐԱՆ



Խոկումներ սեակյան պատկերասրահում

(խոհագրություն)

Ֆակուլտետ՝

բանասիրական

Կուրս՝

մագիստրատուրա 2-րդ

Ուսանողուհի՝

Աննա Սարգսյան

ԵՐԵՎԱՆ 2018

Խոկումներ սևակյան պատկերասրահում

Մերն ինձ համար մեծ, լուրջ, հավիտենական բան է, անիկա միակ զգացումն է, որ մեզ կմոտեցնե աստվածներուն...

Ռուբեն Սևակ

Բազմաթիվ խոսքի վարպետների ստեղծագործությունների գաղափարական առանցքը սերն է եղել՝ իր բազմազան դրսեորումներով, որի կերտումն ու մեկնաբանումը գրականության մեջ լույս աշխարհ է բերել նորանոր հեղինակային աստղաբույլեր: Երբ մարդկային հոգիներում սիրտ տանող ճանապարհին մշուշ է պատել բախտի անիվը, երբ սիրո պակասից սառչել են մարդկային զգայարանները, կամ, հակառակը, հախուռն զգացմունքները հարազատ հոգիներ են փնտրել՝ ինքնարտահայտման ծարավից դրդված, հայտնվել են վարպետ գրչով կերտված ստեղծագործությունները, որոնք ուղենշել են սրտի ճամփան՝ բացելով հուսադրող ապագայի գաղտնիքներ: Հայտնին ու անհայտը իր մեջ ձուլող սերը յուրահատուկ կերտվածք է ստացել Ռուբեն Սևակի վարպետ գրչի ներքո. նրա ստեղծագործությունն ուրույն նկարապատկեր է, որը ոչ միայն փոխանցում է իր ապրումը, այլև առարկայական կերպավորում է ստանում ընթերցողի գիտակցության մեջ: Հարկ է նշել, որ սևակյան բանաստեղծական աշխարհի պատկերասրահում մեծ սենյակ է հատկացված հայրենիքին, իսկ այդ նույն սենյակի պատերն արնաներկ են՝ իրենց ստեղծողի գրքի համագույն խորագրի օրինակով, հարակից սենյակում նրա սերն է՝ բնանկարչական երանգներով... այսպես՝ տարբեր ճյուղավորումներով, տող առ տող ծավալվում է սևակյան պատկերասրահը, որտեղ նախաստեղծ ու հեղինակի երևակայության միջոցով կեպավորում ստացած լուսավոր, և հուսաշունչ պատկերները ներկայանում են ընթերցողին՝ տանելով բազմաբովանդակ խոկումների ճանապարհով:

Ռուբեն Սևակն ունի կյանքի ընկալման յուրահատուկ փիլիսոփայական ըմբռնումներ. նրա ստեղծագործությունները հաջորդում են միմյանց, սնվում միմյանցով, իսկ բնության հետ բանաստեղծի կնքած անբակտելի դաշինքը օգնում է այդ նույն բնության մասնիկ հանդիսացող մարդ արարածի զգացմունքների

բացահայտմանն ու նոր ավիշով է սնում սեակյան խոսքը:

Բանաստեղծի ստեղծագործությունների առաջ քաշած հարցադրումներից ու բազմազան խնդիրներին տրված ինքնատիպ լուծումներից ակնառու է այն անսահման սերը, որը ոչ թե պատված է կուրության բողով, այլ ներկայանում է ճշմարտության լույսի ներքո: Նրա կենսագրության մարմնավորումներն են իր թողած չափածո, արձակ գործերը, որոնք անառարկելիորեն հավաստում են՝ մեր առջև կանգնած է հայրենասեր և ինքնամոռացությամբ իր շրջապատի լավ օրվան նվիրված անհատականություն: Բավական է կարդալ նրա «Հայու որբիկ» բանաստեղծությունը հասկանալու համար այն ճշմարտությունը, որ հեղինակը ոչ միայն իր ժողովրդի ցավերի զգայնաչափն է, այլ նաև ապագայի լուռ մարգարեն:

«Հայու որբիկ» բանաստեղծության մեջ տեսնում ենք հայի անտեր որբիկին, որն արյունոտ ոտքերով քաշկոտվել է մոլորուն, ում գյուղն այրել են, ընտանիքը՝ կորստյան մատնել, իսկ շրջապատի՝ սառնասիրտ, սերը դեպի մարդկայինը կորցրած մարդկանց համար չկա այլևս ո՛չ գութ, ո՛չ էլ հաց հայի ժառանգի համար: Անհերքելի է՝ դժվար է եղել հայի ճակատագիրը՝ լի ցավով ու անգութ հարվածներով, սակայն հարկ է նշել, որ իր հայրենիքի հանդեպ անսահման սիրով լցված, շրջապատի անտարբերությունից վիրավոր բանաստեղծը տվել է հայի փրկության բանաձևը.

Դե՛հ, զրնա՛, մեծցիր ահեղ, որբն հայուն.

Մնի՛ր արյունով ու փսխե արյուն

Մարդկության ճակտին ու սարսափ ու հուր...

— Այդ՝ պարտքըս է տրխուր...¹

Նման խոսքեր կարող էր ասել միայն այն բանաստեղծը, ով գիտեր «ինչո՞ւն», ով գիտեր, որ հայի համար միակ փրկությունը սեփական անցյալի «ահեղ» ժառանգը լինելն է, սակայն, մինևույն է, անգամ նման խոսքեր ասելիս Սևակի գրիչը չի թաքցնում իր անսահման սերը համամարդկայինի մեջ. նա խոստովանում է, որ կո՞իվ տալն ու մարդկային արյուն թափելը հայի *տխուր* պարտքն է, բայց նաև անհերքելի է՝ հեղինակն իր ապրած ժամանակներում սեփական փորձով արդեն հասկացել էր այն ճշմարտությունը, որի մասին պետք է ահագանգեր «Զանգակնե՛ր, զանգակնե՛ր...» բանաստեղծության մեջ.

¹ Ռուբեն Սևակ, Երկեր, Եր., Սովետ. գրող, 1985, էջ՝ 120:

Ու կիյնա այն, որ կը ծնկե ահով,
Զի թուրն ավելի արդար է Խաչեն,
Զի կյանքն անոնց է միայն, որ քաջ են,
Անոնց, որ կ'ապրին ուրիշի մահով...²

Ուշադրության է արժանի այն հանգամանքը, որ սևակյան խոսքերը մարգարեական հնչեղություն ունեն ոչ միայն ներկա ժամանակներում, այլ նաև գալիքի հորիզոններում, չէ՞ որ նրանք պատգամի պես ահագանգում են՝ արդիական և սրտացավ հնչեղությամբ.

Ահա կ'իյնամ... Հայաստանը մա՛յր քեզի:
Կտակ կուտամ այս կուտրած սուրն երկսայրի՝
Ուր հայրիկիդ դեռ տաք արյունը կ'այրի...

Հայ գրողներից շատերին է հաջողվել հայի մեջ վառ պահել անցյալի փառքերն ու կորուստները, որոնց ճանաչումը կենսական է հայրենիքի լուսավոր սպազայի համար: Այդ հայրենասեր գրողների կողքին իր ուրույն տեղն ունի Ռուբեն Սևակը, քանզի նրա գրիչն -ինչքան սրտացավորեն և անկեղծորեն ինքնարտահայտվել է հայի ճակատագրի պատկերման ճանապարհներին, նույնքան ուժգնությամբ էլ պատկերել է իր սրտի գաղտնիքներն իրենց բազմազան հարցադրումներով ու ուրույն պատասխաններով:

Առանձնահատուկ կերտվածք ունի Ռուբեն Սևակի երգած պարզ, բայց ոչ պարզունակ սերը, որն իր իմաստային բարդության միջոցով շամբշային թավշությամբ ձգում է, վերհանում դեպի անբջային ոլորտներ, որտեղ նրա ընթերցողը հայտնվում է «խորհրդավոր անտառներու շուքին» տակ՝ մասնակցելու «գինով» հոգու սիրառատ խնջույքին՝ բոլորին հայտնի սիրո անհայտությամբ ներշնչված: «Գինով սեր» բանաստեղծության մեջ Սևակին հաջողվում է ոչ միայն իր անմնացորդ սերն արտահայտել իր սրտի տիրուհուն, այլ նաև թափանցիկ հյուլեններով կերտել տարաշխարհի իր չքնաղ ծաղկին, որը սիրող սրտի համար և՛ Հրաշք է, և՛ Երագ, և՛ Սեր...

Հավերժական ճշմարտություն է՝ ամեն վայրկյան չճնվող սերը դատապարտված է մահվան: Սևակն իր ստեղծագործության յուրաքանչյուր տողում

²Նույն տեղում, էջ՝ 107:

նորովի է կերտել իր երգած սերը. նորոգ սիրտը գնալով էլ ավելի է զգացել մեծացող սիրո ծարավը, ուստի պատահական չէ, որ սևակյան հոգին փափագել է սիրելիի թաց աչքերի քաղցր թույնի պակասը.

Թաց աչքերդ վրա՝ ս հառե տրտմապես,
Անոնց թո՛ւյնը ներարկե ինձ մեղմորեն,
Որովհետև քու աչքերդ աղվոր են,
Խորհրդավոր անտառներուն շուրփն պես.
Թաց աչքերդ վրա՝ ս հառե տրտմապես:³

Ուրիշ է Սևակի երգած սերը, ուրիշ են նաև սևակյան գիշերը, որտեղ առավել ուժգնորեն է բարխում սիրո զարկերակը, որը մթապատ է, նրբիմաց և թրթռացող լռությամբ շաղախված. նշված հատկանիշների շնորհիվ այն պարուրվում է մեծարենցյան գիշերներին հատուկ անույշությամբ: Սևակը իր բանաստեղծական կտավին լուսանկարչական ճշգրտությամբ է պատկերել Լեման լճի սիրաշունչ միջավայրը. նրան հաջողվել է իրիկվա «հանդարտիկ» հովի միջոցով կերտել մայրամուտի քաղցրիկ շնչով պարուրված անսահմանություն, ուր մթում հևացող ծաղիկները, թռչնիկի նվաղուն երգը՝ հանդարտիկ հովի զրկում ապաստանած, նոր գույներ են տվել կյանքի՝ առօրյա մոխրագույնով ներկված պատկերներին և սևակյան ընթերցողը ստացել է բաց աչքերով երագելու գայթակղիչ հնարավորություն.

Երագներու դյուրթիչ քողին պես անույշ,
Ու սիրառատ սայվածքներու պես մթին
Երեկոյան կիջնե ստվերը քընքույշ,
Մե՛ղմ կիպի լեռան, ջուրին, մարմանդին,
Երագներու դյուրթիչ քողին պես անույշ
Կստվերոտվի չքնաղ լիճը Լեմանի:⁴

Հմուտ նկարչի պես նա պատկերել է իր երևակայությամբ ընկալված լճին, նա գրչով զծագրել է իր ստեղծագործության կապուտաչյա հերոսուհուն, որն ալիքվել է դառը ցավի կապանքներից վիրավոր.

Ա՛հ, վե՛րք մը ունիս կապույտ կուրծքիդ տակ թշվա՛ռ.
Խոսե՛, Լեման, ձա՛յն տուր ջուրիդ ալիքներեն:

³ Նույն տեղում, էջ՝ 62.
⁴ Նույն տեղում, էջ՝ 69.

Լեմա՛ն, Լեմա՛ն, պատմե ինձ սերդ լոիկ:⁵

Լճակի «այշած» ալիքների հետ ընկերանալու փորձ է արել նաև Պերտոս Դուրյանը.

Մելամաղձոտ լրճակդ իմ,

Քեզ հետ ըլլա՛նք մըտերիմ,

Սիրեմ քեզի պես ես այ

Գրավվիլ, լըռել ու խոկալ:⁶

Ե՛վ Դուրյանի, և՛ Սևակի բանաստեղծություններից ծորում է բնությանը փարվելու ցանկությունը, քանզի երկուսն էլ ունեն լին խոկումներին տրվելու ուրույն կարողություններ: Մինչ Դուրյանը լճակին տալիս է հայելային պարզություն, որտեղ տեսնում է իր՝ լուսանկարչական ճշգրտությամբ արտացոլված հոգու պատկերը, Սևակն իր լճակին զարդարում է մայրամուտի բազմաբնույթ գույներով. նա նկարչի վրձնով պատկերում է այնպիսի միջավայր, ուր կապուտաչյա գեղեցկուհու լռությունը սկսում է պատմել իր մեջ հազարավոր հայացքների բացած գաղտնիքները: Ճիշտ է, ալիքները պատմել չգիտեն, բայց հեղինակի գրչի հետ նրանք կազմում են այն դյուբիչ սիմֆոնիան, որի ներքո նորովի են թրթռում մարդկային սրտերի ամենանուրբ լարերը՝ սիրահար իրենց Ալպյանների անհասանելի ձյուններին...նրանք ձուլվում, նույնանում են նույնպիսի ցավից ալեկոծվող հոգիներին, լիճն աննկատելիորեն սկսում է անձնավորվել՝ լռության մեջ երկխոսել, հուզել...Հայտնվելով Սևակի վրձնով պատկերված Լեման լճի նկարի առջև՝ նրա ընթերցողը ակամա սկսում է մտորել, երազել, լսել սևակյան «անույշ» բառապատկերներում իրենց արցալումն ստացած տարաշխարհի հեռավոր, դյուբող ձայները. հեղինակին հաջողվում է նորոգել մարդու և բնության միջև ի սկզբանե կնքված, սակայն տարիների ընթացքում ընկրկող դաշինքը: Ինչպես տեսնում ենք՝ Սևակը մարդու ներաշխարհի բացահայտման ճանապարհին հաճախակի է դիմում բնությանը: Նրա գրիչը «Հոգիս» բանաստեղծության մեջ ծառի մի մասնիկի՝ տերևի, այն է՝ կյանքի մի մասնիկի՝ հոգու բացահայտմանն է ընդառաջ գնում: Նման պատկեր կա նաև Համո Սահյանի «Տերևը» բանաստեղծության մեջ, որտեղ Սահյանը հարդագողը երազող տերևի ողբերգությունն է պատկերում.ցավալի է կողքից դիտել հույսերով լեցուն փարթամ

⁵Նույն տեղում, էջ՝ 70:

⁶Պերտոս Դուրյան, Ստեղծագործությունների ժողովածու, Եր., Էդիթ պրինտ, 2011, էջ՝ 4:

հոգու մի բուռ տերևի վերածվելը («Ձեռքդ բուռ արած ընկել ես հողին, Մի բուռ ձմև ես աղերսում, տերև»⁷), իսկ Սևակի մոտ այդ նույն տերևը պատկերված է խորը հուզականությամբ. Հեղինակը տերևի մեջ տեսնում է իրեն, ողջ էությամբ զգում նրա ցավն ու սարսռում նրա ամեն մի տարուբերումից. այստեղ տեսնում ենք արվեստագետի ու բնության ձուլման հստակ պատկեր.

Անժամանակ թարշամած գարնան տերև մը է հոգիս...

Ծաղիկներուն մեջ կյանքին, գեփյուռին տակ մայիսի.

Ա՛լ ժպտալու անկարող, ան կողողա՛, կմսի՛...⁸

Խոսքն առավել տպավորիչ է դառնում հակադրության լույսի ներքո, ուստի հիվանդ տերևի պատկերումը կանաչ դաշտի մեջ «աղվոր» գարնանը, «բյուր գույներով» ծաղիկների «լռելյայն» ծիծաղի և զինով արևի ներքո ահագնացնում են տերևի հոգեկան անգորության ողբերգությունը. այստեղ պատկերված է կյանքի փոքրիկ, բայց շատ դիպուկ տեսարան. մարդը տանջվում է շրջապատի անտարբեր, գինովի, կույր նայվածքի տակ.

Բայց գարնանային կենսավետ այդ պարին մեջ մոլորուն՝

Հիվանդ տերև՝ մը տեսա, կանաչին մեջ դաշտերուն...⁹

Շրջապատին անտարբեր, ուրիշի ցավերին անհաղորդ բազմության մեջ հեղինակն առանձնանում է, իսկ նրան որպես փրկող առաջատար է մեկնվում բնությունը. այնտեղ բանաստեղծը տեսնում է իր հոգու արտացոլանքը և հենց դա է պատճառը, որ նա մարդկային կերտվածք է տալիս բնությանը, շնչում և ապրում բնությամբ՝ առավել հաստատուն հիմքերի վրա դնելով իր և բնության միջև կանխօրոք կնքված ամուր դաշինքը.

Միրտըս անհուն ցավով լի՛ ես ծոեցա սրգահար

Մատներուս մեջ առի գայն, ու իր մարմինը նիհար

Գուրգուրանքով, արցունքով մոտեցուցի շրթունքիս...¹⁰

Սևակի ստեղծագործության առանձնահատկություններից մեկն այն է, որ այն ոչ միայն հուսադրել, այլ նաև երկխոսել գիտի: Գրքի գաղտնաձայն էջերի խորքից լուռ զրուցում, միմյանց լրացնում են «Էտրլվեյս» և «Աղջկան հոգիներ»

⁷ Համո Սահյան, Մայրամուտից առաջ, Եր., Հայպետհրատ, 1964, էջ՝ 70:

⁸ Ռուբեն Սևակ, Երկեր, Եր., Սովետ. գրող, 1985, էջ՝ 71:

⁹ Նույն տեղում, էջ՝ 70:

¹⁰ Նույն տեղում, էջ՝ 71:

բանաստեղծությունները: Անհերքելի է՝ հաճելի, գուրգուրող են բնության այն տեսարանները, որոնց միջավայրում իրականանում են մարդկային ամենափափագելի երագները, սակայն երբ այդ նույն երագները կորչում են և մարդը կորցնում է իր հարազատ հոգու կողքին լինելու հնարավորությունը, այդժամ հեքիաթային տեսարանը պատկերող ամեն մի մասնիկ խոր ցավ պատճառող հիշողություններ է առաջ բերում, հիշողություններ, որոնք ծաղրում են մահկանացուի անկարողությունը ճակատագրի հաճախ անողոր կարողության առջև: «Աղջկան հոգիներ» բանաստեղծության մեջ մենք հանդիպում ենք «Էտրլվեյսում» պատի վրա «անխոսուկ, մունջ» ծաղկեփնջին՝ հիվանդ կարոտից այրվող, որի հայտնվելու ճանապարհը գաղտնի է պահվում ընթերցողից.

Թառամե՛ր են թերթերդ բուլոբ,

Հյուժեր է ցո՛ղրդ տրամորեն.

Ո՞ր դժբաղդ հո՛վը սալերեն

Քեզ հոս նետեց քայլամուր: ¹¹

«Աղջկան հոգիներ» բանաստեղծության մեջ հեղինակը կեսգիշերվա անշունչ լռության մեջ նամակ է գրում իր սիրելիին, նամակում հիշատակվում են այն նույն Էտրլվեյսի ծաղիկները, գաղտնիքը բացվում է. նրանց քաղել էր ինքը՝ «խեղճ սիրուհիո»՝ «դժբախտ հո՛վի» հետ միասին...

Ու պատիս չար էտրլվայսներն ալ կարծես

«Խե՛ղճ սիրուհի»... կհանկերգեն ինձ տրտում,

Անո՛նք, զոր թեզ հետ քաղեցինք, մոռցա՞ծ ես... ¹²

Շարունակում է հեղինակը խորիմաստ լռել գիշերային մթության մեջ՝ վառ պահելով կարոտի կանթեղը, որը երբեք չի աղոտվում խավարում.

Բաղդը մերժեց ինչ որ սիրտերն ուզեցին.

Դուն քու ճամբեդ քալե մինակ ու հըլու.

Քենե հեռու, քենե անգետ առանձին,

Ես մի՛շտ հոս եմ, քե՛զ տենչալու, քե՛զ լալու... ¹³

Պարույր Սևակը «Գիշերն ու ես» բանաստեղծության մեջ ասել է.

¹¹ Նույն տեղում, էջ՝ 72

¹² Նույն տեղում:

¹³ Նույն տեղում, էջ՝ 73:

Գիշերն ունի ամեն բանի թույլտվություն:

Իսկ ես չունե՞մ...¹⁴

Ռուբեն Սևակը հավաստում է, որ հնարավոր է խլել գիշերվանից ամեն բանի թույլտվությունը՝ հոգու երազների անհայտ թվացող ճանապարհը, նա ապացուցում է, որ գիշերվա մութ միջանցքներում հայացքը սիրո արահետին զամած և մենակությունից ծնված անքնությամբ տառապող մարդը հնարավորություն ունի գտնելու սիրելին տանող դրյակի ճանապարհը, որն անցնում է բնության զիրկը՝ «ակին բով» տանող կածանով.

Ու կփակվին արդեն աչքերս արցունքով.

Նախազգացում մը կըսե ինձ լիահույս.

«Պիտի գնես զայն այս գիշեր ակին բով».

Ու այն ատեն... ա՛հ այն ատեն... մինչև լո՛ւյս...¹⁵

Լի են սևակյան բանաստեղծությունները հույսերով, չէ՞ որ հենց դա է լուսավորում մարդու տառապանքը, ինչպես Միսաք Մեծարենցն է խոստովանել «Վերադարձի երգ» բանաստեղծության մեջ՝ անգամ վիրավոր սրտի մեջ բնակվող կսկիծն ու կյանքի հարվածներն անգոր են հույսի բերած դարմանի առջև.

Փուշեր նետուեցան օրե օր վերքիս,

Ու հոն հեծե՞ծանք մը բերին հովեր.

Բայց սիրո հույս մը կ'արևե հոգիս:¹⁶

Սևակյան սիրերգության գոհարները ցույց են տալիս, թե հեղինակն ինչքան շատ է սիրում «ակին բով» պատկերել սիրային հուզառատ հոգեվիճակներ: Լևոն-Զավեն Սյուրմեյանն ասել է. «Հաջողված պատմությունը փոխանցված ապրումն է...»: ¹⁷ «Պատասխանը» բանաստեղծության մեջ ընթերցողին են փոխանցվում նրա սիրո պատմության ցավալի հետևանքները, ընթերցողն ինքը համակվում է սպասումով այն նամակի պատասխանին, որը գրված էր «վարանումով, հուզումով»: Այս ստեղծագործության մեջ սևակյան ընթերցողին է ներկայանում օրերի մութ միջանցքներում տրտում հայացքը սիրելիի պատասխանի ճամփին զամած մարդկային էությունը, ով, հիշելով իր գրած ամեն մի բառը, նախադասությունը,

¹⁴ Պարույր Սևակ, Երկերի ժողովածու, հ 1, Բանաստեղծություններ, Եր., «Հայաստան» հրատ., 1972, էջ՝ 345:

¹⁵ Ռուբեն Սևակ, Երկեր, Եր., Մովես. գրող, 1985, էջ՝ 73:

¹⁶ Միսաք Մեծարենց, Երկերի լիակատար ժողովածու, Եր., ՀՍՍՀ ԳԱ հրատ., 1981, էջ՝ 47:

¹⁷ Լևոն-Զավեն Սյուրմեյան, Արձակի տեխնիկա. Չափ և խենթություն, Երևան, «Գիտություն» հրատ., 2008, էջ 132:

հարություն է տալիս հանգչելու ճամփան բռնած սիրո կիզիչ հրդեհին, ինչն առավել տպավորիչ է դարձնում ապրումը.

Ըսի թե ես գին՝ վն եմ իր նայվածքին,
Թե կախարդող իր աչքերուն մեջ ծավի՛
Հավետ սուզվի՛ լ կ'ուզեի ես տրտմազին,
Շրթունքներըս իր համբույրի՛ն ծարավի...¹⁸

Հերոսը նախազգում է նամակի անպատասխան մնալու անխուսափելիությունը, բայց շարունակում է իրականության մեջ փարվել իր երագին, գնալ դեպի իր հույսը տանող անշարժ, դալուկ, հուսահատ ճանապարհով.

Կկարծեի թե հուզումեն պիտի լա՛ր
Ու նամակը պիտի տաներ շրթունքին,
Կկարծե՛ի.-այնքա՛ն գորով ու սեր կար
Իր հրաժեշտի համբույրի մեջ տխրամոգին:¹⁹

Ռուբեն Սևակն իր ստեղծագործության մեջ բերում է հոգեբանական նուրբ լուծումներ. նա ցույց է տալիս, որ մարդու ներսում կարող են գաղտնի գոյություն ունենալ այնպիսի մտքեր, որոնք հուզմունքի պահին կարող են հնազանդցենել իրենց տիրոջը: Ահագնացող սպասումը հասունացնում է սիրելիի հանդեպ տարակարծ գնահատականներ արտահայտելու անցանկալի անհրաժեշտությունը. ճառագայթներ որոնող լուսավոր հոգում իր թներն է բացում մութ կանխազգացումը՝ խնդիր ունենալով նվաճել հիշատակված էակի հանդեպ տածած խորը վստահությունը.

Թերևս հեզնեց իմ հառաչնե՛րըս երկչուտ,
Որոնց ամբո՛ղջ հոգիս հանձնել կարձեցի.
Բառերուս վրա թերևս խնդա՛ց ան պչրոտ
Իր նենգամիտ աչքերովը կանացի...²⁰

Պասկալն ասել է, որ տարակուսել Աստծու մասին, նշանակում է հավատալ նրան. բանաստեղծի պատկերած սերն այնքան մեծ է, որ անգամ կասկածի պահերին անհերքելի է անսասան հավատը թանկ էակի նկատմամբ: Ռուբեն Սևակն իր ստեղծագործությամբ զրադացիայով զարգացնում է իր ներկայացրած ապրումների

¹⁸ Ռուբեն Սևակ, Երկեր, Էր., Սովետ. գրող, 1985, էջ 75:

¹⁹ Նույն տեղում:

²⁰ Նույն տեղում:

ընթացքները. բայլ առ բայլ ընդլայնվում են հերոսի աշխարհընկալման ճանաչողության անձայրածիր սահմանները. նա արդեն հասկանում է, որ ինքն իր հույսին հետապնդում է, բայց չի հասնում, սպասված պատասխանը որոնում է, բայց չի գտնում. ի վերջո հեղինակի ապրումները, հոգու անհանգիստ խոկումները գալիս հանգչում են սիրելի հիշատակները վառ պահելու մտքին.

Ու մտածե՛լ բաժանումի իր հետին,
Ավա՛ղ, հետի՛ն համբույրի վրա սիրակեզ,
Երբ անկարող իշխելու ի՛նքն իր սրտին՝
Գլուխը կրծքիս՝ կհեծկլտա՛ր տըղու պես...²¹

Հեղինակը հասկանում է, որ պետք չէ խզել երազային հիշողությունների հետ այնքան թանկ կապը, ուստի նա վառ է պահում հին սիրով կերտված հուզապատ մանրանկարը, որն իր համար ոգեշնչող հույսերի աղբյուր է հանդիսանում: Կարդալով «Պատասխանը» բանաստեղծությունը՝ սևակյան ընթերցողը զգում է, որ վայելուչ է հեղինակի ապրած տառապանքը, որ «կնոջ սիրտը» հեղինակի համար շարքային բառակապակցություն չէ, այլ կանացի էության բացահայտման նուրբ փիլիսոփայություն՝ ուղղված կնոջ ներաշխարհի հուզական խորքերի բացահայտմանն ընդառաջ.

Ո՛վ կնոջ սիրտ, պաշտամունքով, արցունքով
Ու կեղծիքով հրաշակերտված սի՛րտ աղվոր,
Ուր կարկաչող սիրո չքնա՛ղ ակին քով՝
Մոռացության անդո՛ւնդը կա ահավոր...²²

Բանաստեղծության տողատակում հայտնվում է Հովհաննես Թումանյանի «Ժպտուն աչքեր» ստեղծագործությունը: Ամենայն հայոց բանաստեղծը, բերելով «կորստյան անդունդի ծայրին» բուսնած ժպտուն աչքերի կործանարար վտանգը, ահազանգել է.

Դու մի՛ հավատա ժըպտուն աչքերին,
Շատ անգամ նրբանք ծաղիկներ են վառ,
Բուսած կորրստյան անդունդի ծայրին,

²¹ Նույն տեղում:

²² Նույն տեղում:

Միամիտ մարդկանց քարշելու համար, ²³

Ռուբեն Սևակի պատկերած սերն ապացուցում է, որ մոռացության անդունդի եզրին գիտակցորեն կանգնելու համարձակությունն է իրական սիրո առհավտյան, ուստի հեղինակը գիտակցաբար միշտ վառ է պահում իր անմնացորդ սիրո անադարտ հիշատակը: Մեկ այլ բանաստեղծության մեջ («Պիտի սպասե՛մ...») բանաստեղծը հավաստիացնում է՝ հենց այդ հիշատակն է, որ օգնում է տարիներ շարունակ սպրել սպասման երազով. հուսալ այնքան սպասված նամակին և հանդիպմանը.

Երե՛ք տարի: Դեռ կ'սպասե՛մ ես իրեն:

Ահա տարտամ հորիզոններն հեռավոր,

Ահա ճամբան, որ կ'երկարի տրտմորեն,

Լռիկ ճամբան, որ գայն տարա՛վ մենավոր:²⁴

Երկարատև սպասումը կարող է սպանել սիրո հիշատակի պատառիկներն անգամ, սակայն սևակյան սպասումները նորոգվում, նորովի են բոցավառվում հիշատակներից. քաղցր են Սևակի համար վերջին հրաժեշտի վայրկյանները, ուստի նա մեծ սիրով հիշում է «գյուղի վերջին տունը ցած», որի հետևի եղննու ծառի կողքին ինքն իր հայացքով ուղեկցել է իր սրտի տիրուհուն.

Երկա՛ր, երկա՛ր ես մնացի քարացած

Ու իր մեկնի՛լը դիտեցի արցունքով...

Ռուբեն Սևակն իր ստեղծագործությամբ հավաստիացնում է, որ իր սիրո դեմ անկարող է անգամ վիրավոր սրտի այն չար ձայնը, որ տրտում գիշերներին հուշում է՝ «Ան չի պիտի գա»...: Ինչպես մութ սենյակում նստած մարդը, որ սպասում է աչքերի՝ մթության հետ հաշտություն կնքելուն, հեղինակը նույնպես սպասման անորոշ մթությանը համակերպվելով՝ մարտահրավեր է նետում ժամանակի անողորմ ակնթարթներին.

Ա՛խ, կճանչնամ քու բողոքի ձայնը,

Վի՛շտ.- Սակայն իգո՛ւր, ա՛յս ի՛ն գիրըս նքսեմ.

Գնա՛ պատմել Տարիներուն, թե ես միշտ

²³ Հովի. Թումանյան, հ-Ի, Բանաստեղծություններ, Երևան, Հայկական ՍՍՀ ԳԱ հրատ., 1988, էջ՝ 148:

²⁴ Ռուբեն Սևակ, Երկեր, Եր., Սովետ. գրող, 1985, էջ՝ 76:

Պիտի սպասեմ, պիտի սպասեմ, սպասե՛մ...²⁵

Ռուբեն Սևակի ըմբռնմամբ իսկապես սիրող սիրտը համառորեն փարվում է սպասման «քաղցր» անդնդին, կառչում պայքարի անվերջ թվացող ուղուց: Լեռնարդո դա Վինչիի կարծիքով՝ այնտեղ, որտեղ մահանում է հույսը, ծնվում է դատարկությունը, ուստի պատահական չէ, որ զրոդն իր ամեն մի տողով ցավին ու տառապանքին մարտահրավեր է նետում: Նրան հաջողվում է հմտորեն խույս տալ օտարության, լրվածության տևական, հոգին քայքայող մտքերից. նա վարպետորեն սկսում է կերտել իր սիրո փիլիսոփայության ապարանքը, ուր ամենամեծ սենյակը հատկացնում է Մեծն Սպասմանը: Սևակի սիրո բանաձևի առանձնահատկությունն այն է, որ *տենչանքի միջով անցած* իր սիրո համար բաց են հուսալի հետդարձի անգամ անիրական ճամփաները և նրա սիրտն անընդհատ երգում է իր հույսով ու լույսով սնված հավատի խոսքերը.

Հուսա լ, հուսա լ վեղդարձի օրերուն...

...Ես կսպասեմ իրեն սիրույս իմ հըլու:²⁶

Բանաստեղծի սիրո ընկալումների առանձնահատկություններից մեկն այն է, որ նա չունի հանձնվելու ցանկություն, նա սիրում է անգամ սպասումից ծնված ցավը, որն իր առավել հուզառատ պատկերումն է ստանում «Եկո՛ւր» բանաստեղծության մեջ: Այստեղ գիշերային խորունկ լռությունը պատում է նրա հոգին վհատությամբ, որից էլ ծնունդ է առնում հեղինակի ինքնամոռաց սևեռվածությունը տառապանքի կամուրջներին.

Եկո՛ւր, եկո՛ւր ճամբաներեն անուրջիս.

Մրտիս ջահերն այրեցի թեզ ի հանդե՛ս.

Վերջի՛ն անցորդ տառապանքի կամուրջիս,

Երզի մը պես, քրոջ մը պես՝ մոր մը պես

Եկո՛ւր, եկո՛ւր, ճամբաներեն անուրջիս...²⁷

Անսահման է հեղինակի սերն իր անմարմին երգերը մարմնավորող դիցուհու նկատմամբ, ուստի նա շարունակում է համառորեն խենթի պես սպասել նրան և հենց այս բանաստեղծության հետ են հատվում Թեքեյանի «Հաշվեհարդար»

²⁵ Նույն տեղում:

²⁶ Նույն տեղում:

²⁷ Նույն տեղում, էջ՝ 124:

ստեղծագործության հետևությունները.

Եվ այժմ, ո՛վ լտեր, հակառակ իմ տանջանքիս , հակառակ
Ինձի համար սա չորացած երջանկության աղբյուրին,
Հին զինիով հորդարուխ ես կարբենա՛մ տակավին...²⁸

Սևակն արբենում ու արբեցնում է իր ապրած խորը սիրով. սիրո փառաբանման ճանապարհին «զինով» հոգին չի բացառում ցավն ու տառապանքը՝ նրա սիրո քնարը շարունակում է ճշմարտության այբուբենով կերտել սեր կոչվող զգացմունքն ամբողջապես բնութագրող բառեր, որոնք ձուլվելով կառուցում են անհերքելի խոհեր.

Ո՛վ չի սիրեր պիտի մեռնի առհավետ.

Սերը պե՛տքն է, երա՛զն է, կյա՛նքն է կյանիքն.

Սերը Մահվան մեջ Անուրջն է առհավետ.

Եկուր, եկուր , եկուր սիրենք կաթոզին:²⁹

Ուշարժան է այն, որ սևակյան բանաստեղծություններն ունեն համար բնավորություն, նրանք պատկերվում են անընկճելի անհատի փառաբանման ճանապարհով: Նույնքան համառությամբ և անխափան սիրով հեղինակը կապված է իր հայրենիքին, պատահական չէ, որ կիլիկյան ջարդերից հեղինակը լույս աշխարհ է հանել «Ձանգակնե՛ր, զանգակնե՛ր...» բանաստեղծությունը: Անուրանալի է այն ճշմարտությունը, որ այստեղ գետեղված սևակյան խորը մտքերը արդիական են բոլոր ժամանակների համար, իսկ հասկանալու համար Ռուբեն Սևակի ստեղծագործության ազդեցիկությունն ու վերժամանակայնությունը, բավական է հիշել Եղիշե Չարենցի խորիմաստ խոսքերը.

Թե ուզում ես երգի լսեն,

Ժամանակիդ շունչը դարձիր,

Կապվիր նյարդով յուրաքանչյուր

Քո օրերին ու քո դարին:³⁰

Հարկ է նշել, որ Ռուբեն Սևակի մանրագնին գրողական հայացքը բացահայտել և ժամանակի դատին է հանձնել իր հայրենակիցների ցավի ու տառապանքի

²⁸Ռուբեն Որբերյան, Ռուբեն Սևակ, Վահան Թեբեյան, Մատթեոս Զարիֆյան, Երկեր, Եր., Սովետ. գրող, 1981, էջ՝ 300:

²⁹Ռուբեն Սևակ, Երկեր, Եր., Սովետ. գրող, 1985, էջ՝ 125:

³⁰ Եղիշե Չարենց, Պոեմներ, բանաստեղծություններ, Եր., Երևանի համալս. հրատ., 1984, էջ՝ 373:

ակունքները.

Որովհետև դեռ հեռու է օրն այն,
Երբ գայլս ու գառնուկ սիրով արածին...
Թե ապրիլ կ'ուզե գառը նորածին
Պետք է իր ակռան սրե լռելյայն...³¹

Նրա խոսքերը վերժամանակյա հնչեղություն են ստանում իրենց պատկերման մեջ: Այստեղ տեսնում ենք մարգարե քանաստեղծին, ով իր գործով ու խոսքով վաստակել է «մեծերի» սխալները վիճարկելու հանձնառությունը, չէ՞ որ երբ ժողովուրդն ուղղորդողի կարիք ունի, նրա վստահությանն արժանացած մարդիկ իրավունք չունեն իրենց «բարձրից» չտեսնելու «երկյուղածորեն» մահ գտած որբերի, ծերերի և կանանց զոհաբերվելը: Հեղինակն այստեղ իր արդար բողոքն ուղղում է հյուրյան քարոզով հավատը մեկնողների, եկեղեցու «խուլ զանգերի» դեմ: Եթե սիրո մեջ Ռուբեն Սևակը քարոզում էր հուզառատ սպասում, ապա հայրենիքի փրկության ճանապարհին սպասման «ելքերը» վաղուց արդեն իրենց անգործությունն ապացուցող փաստերով են ներկայացել նրան, ուստի այստեղ հեղինակը սպասման հույսերը փշրելու հանձնառությունն է ստանձնել քանզի.

Գույժ տվեք վաղվան զի հասկը մեռավ.
Գույժ տվեք հայուն, զի ազգը մեռավ.
Զանգակնե՛ր, ծերո՛ւկ, բարի՛ զանգակներ...³²

Ռուբեն Սևակն ասել է.« Ինձ համար գրելը երգել է: Բոլոր մխիթարությունս սա երկաթի փոքրիկ գրչիս մեջն է: Ու մենավոր ապաստանիս մեջ՝ ձմրան գիշերներ, ինձան երջանիկ մարդ չէ կարելի երևակայել՝ ոտանավորի մը ավարտումեն վերջ»: Մեծ մտավորականը զագցել է, որ իր ամեն մի տողով մաքառման հույս ու պայքարի հաստատակամություն է ներարկելու իր ընթերցողին: Նրա խոսքին հաջորդեց իր ազգայնանվեր, զոհաբերում պահանջող ճանապարհը, սակայն բնության հետ «քով-քովի» քայլող, ճշմարտության զանգերը հնչեցնող մտավորականը նաև գիտակցեց, որ իր ամեն մի քերթվածով կրթելու և ուղղորդելու է իր հարազատ ժողովրդին:

Ռուբեն Սևակի կյանքը մաքառման և խավար օրերին հույսի ջահեր վառելու, հայրենիքի համար անձնանվեր պայքարի ելնելու կոչ է: Ուշադրության է արժանի

³¹ Ռուբեն Սևակ, Երկեր, Եր., Սովետ. գրող, 1985, էջ 107:

³² Նույն տեղում:



այն հանգամանքը, որ սևակյան հայրենասիրական և սիրային երակ ունեցող ստեղծագործությունները կազմում են կուռ հակադրամիասնություն. միասին են իրենց նվիրվածությամբ, բնության հետ անմնացորդ ձուլումով, հախուռն կերտվածքով, սակայն հակադիր են «սպասում» կոչվող երևույթին տված պատասխաններով:

Սևակյան հոհերի առարկայացումներից անցել են տարիներ, սակայն նրա խոսքերը արդիական են անգամ գալիքի մարդու համար. երբ մարդիկ անտարբերությամբ են լցվում շրջապատի նկատմամբ, լռությունն ու ճիչերը դրվում նույն նժարին, այդժամ մարդու մեջ սկսում է խավարել հոգևոր տեսողության լույսը, իսկ դեպի լույսը տանող հետդարձի ճանապարհը Ռուբեն Սևակը վարպետորեն կառուցել է իր ամեն մի գրվածքում, որոնք կարդալով և որոնց շուրջ խորհելով՝ իրենց դերը «կյանք» կոչվող ներկայացման ժամանակ շարունակաբար տապալողները կգտնեն մարդու իրական հանձնառության գաղտնիքը բացող բանալին. կհասկանան, որ սեր տալով միայն կարող են վաստակել իրենց և շրջապատի բաժին երջանկությունը, իսկ այդ սերը պետք է տան և՛ իրենց ժողովրդին, և՛ ընտանիքին, և՛ սիրուն, և՛ կրկնակի՝ հայրենիքին:

Ինչպես տեսնում ենք՝ Ռուբեն Սևակ հասկանալու համար բավական չէ նրա ստեղծագործական պատկերասրահի մի սենյակում երկար մնալը, նույնաթեմա պատկերում ստացած ստեղծագործությունների տևական գնումը, քանզի բազմաշերտ գրողի խոհերը համապրելու համար անհրաժեշտ է դեզերել նրա ստեղծագործությունների գայթակաղիչ հանգրվաններում, քանի որ նրանք, անկախ թեմատիկ ընդգրկվածության, լրացնում են միմյանց:

Գրականության մեջ շատ գրողներ են հավերժության շարունակական փնտրտուքների մեջ փորձել անմահացնել իրենց ստեղծածը. հաջողված արդյունքները պահպանել են իրենց գոյությունը դարեր շարունակ՝ արարիչներին պարզելով երանության դափնիներ: Նույնպիսի դափնի կրելու իրավունքն է վաստակել Ռուբեն Սևակի գրիչը, չէ՞ որ նրա ինքնամոռաց սիրո հյուլներով կերտված ստեղծագործական պատկերասրահը վերժամանակյա է... այնտեղ անհատի ներաշխարհն է, հայի անցյալը, ներկան ու ապագան...

Օգտագործված գրականության ցանկ

1. Եղիշե Զարենց, Պոեմներ, բանաստեղծություններ, Եր., Երևանի համալս. հրատ., 1984:
2. Լևոն-Զավեն Սյուրմեյան, Արձակի տեխնիկա. Զափ և խենթություն, Երևան, «Գիտություն» հրատ., 2008:
3. Համո Սահյան, Մայրամուտից առաջ, Եր., Հայպետհրատ, 1964:
4. Հովհ. Թումանյան, Ի-Ի, Բանաստեղծություններ, Երևան, Հայկական ՍՍՀ ԳԱ հրատ., 1988:
5. Միսաք Մեծարենց, Երկերի լիակատար ժողովածու, Եր., ՀՍՍՀ ԳԱ հրատ., 1981:
6. Պարույր Սևակ, Երկերի ժողովածու, Ի-Ի, Բանաստեղծություններ, Եր., «Հայաստան» հրատ., 1972:
7. Պետրոս Դուրյան, Ստեղծագործությունների ժողովածու, Եր., Էդիթ պրինտ, 2011:
8. Ռուբեն Որբերյան, Ռուբեն Սևակ, Վահան Թեքեյան, Սասթրետոս Զարիֆյան, Երկեր, Եր., Սովետ. գրող, 1981:
9. Ռուբեն Սևակ, Երկեր, Եր., Սովետ. գրող, 1985:

- 1) Ռ. Սևակի գեղարվեստական համալսարանի քննադատ Ե. Թումանյան, ՍԵՅ-Ի, Գ. Սևակի, Գ. Դարբեր, Ռ. Որբերյանի, Համո Սահյանի գծերի վերանայումը:
- 2) Չեխովսկու և սրբի նա ընդհանուր, այսպիսի ոչ բնորոշումը ինչպես բանաստեղծության փոփոխությունը:
- 3) Դեպքի ինտերպրետացիա առաջադրված:
- 4) Գրական ընթացիկ չէ: